

Aningaasaateqarfimmi aningaasat katersat ileqqaakkallu erniaat taamaallaat atorpeqarsinnaaneri siunertaralugu Aatsitassarsiornermi Aningaasaateqarfik pillugu Inatsisartut inatsisaannut nr. 6, 5. december 2008-meersumut allannguutissamik saqqummiussinissaannik Naalakkersuisut peqquneqarnissaannut Inatsisartut aalajangiiffigisassaattut siunnersuut.

Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata nr. 6, 5. december 2008-meersup allanngortinneqarnissaanut Naalakkersuisut peqquneqarnissaannut Inatsisartut aalajangiiffigisassaattut siunnersuut, imaalillugu Inatsisartut ukiut tulleriissut aappassaanni nunatta karsiata naatsorsuutaanik aatsaat akuersereeraangata aningaasaateqarfik aallartinneqartassasoq, aatsaallu ukiumi naatsorsuiffiusumi aatsitassanit isertitat 10 millioner kroninit annertunerusimappata. Inatsisartut inatsisaat ukiup tullissaani 1. januarimi atuutilissaaq imaluunniit Naalakkersuisut aalajangiippata siusinnerusuklut. 10 millioner kronit taaneqartut Inatsisartut ukiumi pineqartumi Aningaasaqarnermut inatsisaat naapertorlugu ataatsimut isigalugu akit akissarsiallu nalingannut naleqqussarneqartassapput.

Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata nr. 6, 5. december 2008-meersup allanngortinneqarnissaanut kingusinnerpaamik UPA2016-imi Naalakkersuisut peqquneqarnissaannut Inatsisartut aalajangiiffigisassaattut siunnersuut, imaalillugu Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaanni aatsitassarsiornermit isertitanut paasinninnera Namminersorneq pillugu inatsimmi aatsitassarsiornermit isertitanut paasinninnermit immikkoortinneqassasoq. Allanguinermi tigussaasumik atortut, soorlu oliamik maqisuunnginnissamut atortut, illuutit sanaartukkalluunniit allat atortullu Kalaallit Nunaata Aatsitassarsiornermi Aningaasaateqarfiani aatsitassarsiornermit isertitatut naatsorsuutigineqannginnissaat allanneqartariaqarpoq.

(Inatsisartunut ilaasortaq Naaja Nathanielsen, Inuit Ataqatigiit)

Akissuteqaat

(Aningaasaqarnermut Aatsitassanullu Naalakkersuisoq)

Aappassaanneerpeqarnera

Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaat nr. 6, 5. december 2008-imeersumut allannguutissatut siunnersuutinik pingasunik saqqummiussinissamut Naalakkersuisut peqquneqarnissaat pillugu aalajangiiffigisassatut siunnersuutit pingasut taakkua pillugit Aningaasaqarnermut Akileraartarnermullu Ataatsimiititaliap isumaliutissiissutaanut Naalakkersuisut sinnerlugit matumuuna qujavunga.

Isumaliutissiissutip misissorneqareernerani Naalakkersuisut makkuninnga oqaaseqaatissaqarput.

Naalakkersuisut maluginiarpaat ataatsimiititaliap isumaqatigiittup immikkoortoq 121-ip akuerineqarnissaa inassutigigaat. Maannakut ataatsimiinnermi oqaluuserisassani immikkoortup 119-ip ataani, Inatsisartut aalajangiiffigisassaattut siunnersuummut assigusumik, aatsitassarsiornermi aningaasaateqarfik pillugu inatsimmu allannguutissatut siunnersuummik saqqummiussisoqarmat, tamanna annertunerusumik oqaaseqarfigineqassanngilaq.

Aningaasaqarnermut Akileraartarnermullu Ataatsimiititaliami amerlanerussuteqartut oqaluuserisassani immikkoortup 120-ip akuerineqarnissaa inassutigigaat. Tassa imaappoq aningaasaateqarfimmit aningaasat qanoq annertutigisut tiguneqarsinnaanersut maleruagassanik sukannerulerulersitsinissamut siunnersuuteqarlutik, kiisalu aningaasaateqarfiup aningaasaliisarfiinut allaffissornermullu politikkimut eqaannerusumut siunnersuuteqarlutik aatsitassarsiornermi aningaasaateqarfik pillugu inatsimmu allannguutissatut siunnersuummik Naalakkersuisut saqqummiussissasut. Siullermeerinninnissamut akissuteqaammi Naalakkersuisut oqaatigaat 2016-imi upernaakkut ataatsimiinnissamut allannguutissatut siunnersuummik saqqummiussinissaq naatsorsuutigineqartoq. Aatsitassarsiornermi aningaasaateqarfiup aningaasanut isertitanut isumasuutip allannguuta aningaasaqarnermut aatsitassarsiornermi aningaasaateqarfiup sipaarniarneranut naleqqiullugu annertuumik kinguneqarsinnaavoq. Taamaammatt pingaartinneqarpoq allannguinnissamut siunnersuut isumannaatsumik ilusilerneqarnissaa, ilanngullugulu aatsitassanut isertitat arlallit annertuut sapinngisamik aningaasaateqarfimmut sipaarneqassasut. Isumaliutissiissummi allassimavoq, 2016-imi ukiaanerani ataatsimiinnissamut allannguutissatut siunnersuummik saqqummiussinissaq pillugu Naalakkersuisut siunnerfeqarnerat kinguarsarneqassanngitsoq ataatsimiititaliap naatsorsuutigigaa. Paasissutissiissutigineqarsinnaavoq 2016-imi ukiaanerani ataatsimiinnissamut allannguutissatut siunnersuummik saqqummiussinissaq Naalakkersuisut suli siunnerfigigaat.

Aningaasaqarnermut Akileraartarnermullu Ataatsimiititaliami amerlanerussuteqartut taamatuttaaq oqaluuserisassani immikkoortup 122-ip akuerineqarnissaa inassutigigaat. Tassa imaappoq aatsitassarsiornermi aningaasaateqarfimmut tunngatillugu pigisanik tigussaasunik naatsorsuisarneq pillugu aatsitassarsiornermi aningaasaateqarfik pillugu inatsimmu allannguutissatut siunnersuummik Naalakkersuisut saqqummiussissasut. Siunnersuutip

siullermeerneqarnissaanut akissuteqaammi Naalakkersuisut oqaatigaat 2016-imi upernaakkut ataatsimiinnissamut, Aatsitassarsiornermi Aningaasaateqarfimmut isertitanut nassuiaassummi pigisanik tigussaasunik naatsorsuisarneq pillugu aatsitassarsiornermi aningaasaateqarfik pillugu inatsimmut allannguutissatut siunnersuummik suliaqarnissaq naatsorsuutigineqartoq.

Siunnersuutit upernaakkut ataatsimiinnermi naammassillugit suliarineqarnissaat naatsorsuutigalugu siullermeerinninnissamut akissuteqaat UPA2015-imi suliarineqarpoq. Taamaattumik suliaqarneq suli aallartinneqanngilaq, tassami tamatumuma pinissaanut Inatsisartut aalajangiinissaat utaqqineqarmat. Taamaattumik 2016-imi upernaakkut ataatsimiinnissamut pigisat tigussaasut naatsorsorneqartarnerannut tunngatillugu allannguutissatut siunnersuummik saqqummiussereernissaq Naalakkersuisunut ajornakusoortussaavoq. Peqatigisaanik Naalakkersuisut isumaqarput aatsitassarsiornermi aningaasaateqarfik pillugu inatsimmut allannguutissatut siunnersuummik 2016-imi upernaakkut ataatsimiinnissamut aammalu ukiaanerani ataatsimiinnissamut saqqummiussinissaq naleqqutissanngitsoq. Taamaattumik Naalakkersuisut inassutigaat, pigisat tigussaasut naatsorsorneqartarnerat pillugu allannguutissatut siunnersuut aamma 2016-imi ukiaanerani ataatsimiinnissamut saqqummiunneqassasoq, taamaalilluni oqaluuserisassani immikkoortoq 120-imut aamma 122-imut tunngatillugu allannguutissatut siunnersuutit ataatsimoortillugit saqqummiunneqassallutik.

Immikkoortoq 121-imi aalajangiiffigisassatut siunnersuutit akuerineqassasut Naalakkersuisut inassutigaat.

Immikkoortoq 120-imi aamma 122-imi aalajangiiffigisassatut siunnersuutit ilusimisut iluseqartillugit itigartinneqassasut Naalakkersuisut inassutigaat. Peqatigisaanik 2016-imi ukiaanerani ataatsimiinnissamut, ilaatigut aatsitassarsiornermi aningaasaateqarfimmut isertitanut nassuiaassut naapertorlugu pigisanik tigussaasunik naatsorsuisarnermut, ilaatigut aningaasaateqarfimmit aningaasat qanoq annertutigisut tiguneqarsinnaanersut maleruagassanik sukannerulerulersitsinissamut siunnersuuteqarlutik, kiisalu aningaasaateqarfiup aningaasaliisarfiinut allaffissornermullu politikkimut eqaannerusumut siunnersuuteqarlutik allannguutissatut siunnersuummik ataatsimoortumik saqqummiussinissaq Naalakkersuisut naatsorsuutigaa.

Taamatut oqaaseqarlunga siunnersuutip Inatsisartuni aappassaanneerneqarnissaanut suliassanngortippara.